

**Kommunini suliaasaqarfiit aqqissuuteqqinneqarnerat pillugu inatsisartut  
inatsisaannut nr. xx, yy -meersooq**

allannguutissatut siunnersuut.

Inatsisartut Aqqissuusseqqinnissaq pillugu Ataatsimiititaliarrigallagaata saqqummiussaa.

§ 8-mut

**1.** Paragraffi imatut oqaasertaqassaaq:

"§ 8. Ataatsimoorussamik nunaqarfinni aqutsisunik qinersisoqassaaq. Kommunip ataatsip iluani ataatsimoorussamik nunaqarfinni aqutsisut minnerpaamik nunaqarfiit marluk ilaassapput. Nunaqarfiit sorliit ataatsimoorussamik nunaqarfinni aqutsisoqassanersut ilaasortallu qassit qinerneqassanersut kommunalbestyrelsimit aalajangiiffigineqassapput. Tamanna pillugu aalajangiineq ataatsimoorussamik nunaqarfinni aqutsisunik qinersinissap ukiup siuliata naannginnerani aalajangerneqassaaq. Ataatsimoorussamik nunaqarfinni aqutsisunik qinersineq siullem 2009-mi aprilimi ingerlanneqassaaq.

*Imm. 2.* Nunaqarfiit avinngarusimavissut nunaqarfiilluunniit inuttuut pillugit imm. 1-mi, oqaaseqatigiit aappaanni piumasqaammut atatillugu Naalakkersuisut immikkorluinnaq pisuni immikkut akuersissuteqarsinnaapput. Naalakkersuisut aalajangiinermi kommunalbestyrelse pineqartoq nunaqarfinnit marlunnit amerlanerusunik nunaqarfeqarpat qanoq annertutigisunik ataatsimoorussamik nunaqarfinni aqutsisuliisimanersut pingaartissinnaavaat.

*Imm. 3.* Ataatsimoorussamik nunaqarfinni aqutsisunik qinersineq pissaq kommunalbestyrelsinut, nunaqarfinni aqutsisunut ilagiillu sinniisaannut qinersisarnerit pillugit inatsisartut inatsisaanni malittarisassat naapertorlugit. Ataatsimoorussamik nunaqarfinni aqutsisunik qinersinermi, imm. 1 naap., ataatsimoorussamik nunaqarfinni aqutsisunut ilaatinneqartut nunaqarfiit qinersivittut ataasiusutut isigineqassapput."

Allannguutissatut siunnersuummut nassuiaatit

## **Nalinginnaasumik nassuiaatit**

Nunaqarfinnit ikinnerpaamik marlunnit ataatsimoorussamik nunaqarfinni aqutsisoqarnissamik piumasqaammit immikkorluinnaq ittumik immikkut akuersissummik angusaqarnissamut allannguutissatut siunnersuutikkut kommunalbestyrelse periarfissinneqassaaq. Nunaqarfiit avinngarusimasunit avinngarusimanerusut pillugit immikkorluinnaq pisuni Naalakkersuisut tamatumanga immikkut akuersissuteqarsinnaassasut taamaalilluni siunnersuutigineqarpoq.

Nunaqarfinnut allanut sanilliullugu nunaqarfik ima ungasitsigippat nunaqarfiit allat ilanngullugit ataatsimoorussamik nunaqarfinnut aqutsisulinnut ilaatinneqartariaqarani, tamatumani innimi-giniarneqarpoq.

UKA 2007/30-ip aappassaaneerneqarnerani Inatsisartut allannguutissatut siunnersuut akuersis-sutigisaat nunaqarfinni aqutsisoqarnerup ilaasortat amerlassusii affaannangorlugit ilusilittut qulak-keerneqarnissaanik ilaatigut siunertaqarpoq. Taamaattumik kommunalbestyrelse pineqartoq ataatsimoorussamik nunaqarfinnut aqutsisunik nunaqarfinnit marlunnit amerlanerusunit peqataaffigineqartumik qanoq annertutigisumik katiterisimanagera immikkut akuersissuteqarnermik nalunaaruteqarnissamik aalajangiinermi Naalakkersuisunit pingaartinnaassasoq siunnersuutigineqarpoq. Taamaalilluni aallaavissaaajuassaaq nunaqarfinnut aqutsisut ataatsimut amerlassusiisa affaannangortinneqarnissaat.

*Allannguutissatut siunnersuutip aqutsinikkut kinguneqaatissai:*

Allannguutissatut siunnersuut aqutsinikkut kinguneqaateqassanngilaq.

*Allannguutissatut siunnersuutip aningaasaqarnikkut kinguneqaatissai:*

Allannguutissatut siunnersuut ima aqutsivigineqassasoq naatsorsuutigineqarpoq, aningaasartuuteqaataassanani.

## **Aalajangersakkanut ataasiakkaanut nassuiaatit**

*Nr. 1-mut*

Nunaqarfiit ikinnerpaamik marluuppata ataatsimoorussamik nunaqarfinnut aqutsisunik pilersitsinissamik piumasqaammit immikkut akuersissinnaanerup anguneqarnissaa allannguutissatut siunnersuutikkut ajornarunnaasaaq. Taamaalilluni nunaqarfiit avinngarusimasunit avinngarusimanerusut pillugit immikkorluinnaq pisuni Naalakkersuisut immikkut akuersissuteqarsinnaassapput.

Nunaqarfiit marlunnit *amerlaneruppata* kommunalbestyrelse pineqartoq  
ataatsimoortumik nunaqarfinnut aqutisunik qassinik katiterisimansoq immikkut  
akuersissuteqarnermik aalajangiinermi Naalakkersuisut pingaartitsinnaavaat.  
Ataatsimoortumik nunaqarfinnut aqutisusunik pilersitsineq nunaqarfiit aqutisuisa  
maannakkut amerlassusiinik affaannangortitsisoqassasoq minnerpaamik  
anguniartariaqarpoq.